

Dalam Negeri

(12 Februari 2022), Utusan Malaysia, p. 4

DBKL perlu dinamik, produktif urus isu perbandaran - PM

Oleh OMAR ZIN
utusannews@mediamulia.com.my

KUALA LUMPUR: Sebagai pihak berkuasa tempatan yang mentadbir Kuala Lumpur, Dewan Bandaraya Kuala Lumpur (DBKL) perlu dinamik dan produktif dalam mengurus isu perbandaran serta memperkasakan penyampaian perkhidmatan.

Gesaan itu dibuat Perdana Menteri, Datuk Seri Ismail Sabri Yaakob kerana beliau berpandangan Kuala Lumpur harus lebih bersedia mendepani cabaran dan melihat kepada keperluan masa depan.

Katanya, Keluarga Malaysia mengamalkan prinsip tiada yang dipinggirkan dan prinsip itu terpakai dalam mengurus bandar raya Kuala Lumpur.

"Golongan B40 misalnya, perlu diambil perhatian bagi memastikan keperluan asas mereka terbela. Kewujudan media baharu lebih mendekatkan warga kota dengan pentadbir bandar raya. Ekspektasi warga kota kepada DBKL adalah tinggi. Justeru, keterlibatan warga kota dalam membangunkan Kuala Lumpur adalah penting.

"Ini bagi memastikan suara mereka didengari dan diambil kira dalam segenap perkara. Warga kota merupakan tunjang keutuhan Kuala Lumpur. Suara dan pandangan mereka inilah



ISMAIL Sabri Yaakob bersama Menteri Wilayah Persekutuan, Datuk Seri Shahidan Kassim (kanan) dan Timbalannya, Datuk Seri Jalaluddin Alias (kiri) pada Majlis Sambutan Ulang Tahun Ke-50 Bandaraya Kuala Lumpur di ibu negara baru-baru ini.

yang akan menggerakkan usaha kerajaan khususnya terhadap objektif dalam pentadbiran Kuala Lumpur hari ini. Hal ini selari dengan iltizam saya sebagai Perdana Menteri," katanya.

Sehubungan itu, bersempena ulang tahun ke-50 bandar raya Kuala Lumpur, Ismail Sabri memperkenalkan Pakej Kesejahteraan Keluarga Malaysia

Kuala Lumpur (PKKMKL).

"Dalam meningkatkan kualiti kehidupan rakyat, DBKL menyediakan laluan pejalan kaki, laluan basikal dan jaringan hijau dengan mengutamakan keselesaan pengguna.

"Bagi menggerakkan aktiviti ekonomi, DBKL menaik taraf gerai penjaja di pusat penjaja yang telah usang termasuk kelompok-

kelompok gerai di tepi jalan yang berlesen," katanya.

Selain itu katanya, DBKL kini dalam usaha menjadikan Kuala Lumpur sebagai bandar raya sifar miskin tegar.

"DBKL akan membina 5,000 'council home' untuk disewa kepada warga kota dengan keluasan minimum 750 kaki persegi, pembaikan lif yang

melibatkan 306 buah lif di 31 lokasi Projek Perumahan Rakyat (PPR) dan Perumahan Awam (PA).

"Bagi menjamin keselamatan warga kota, tahap keselamatan di Kuala Lumpur dipertingkatkan dengan pemantauan melalui kamera litar tertutup (CCTV) yang dikawal Kuala Lumpur Command & Control Centre," katanya.

Di samping itu katanya, lesen premis perniagaan diluluskan dalam tempoh 24 jam, malah permohonan permit pembinaan bagi pembangunan berskala kecil dan keputusan permohonan boleh diperolehi dalam tempoh tiga hari.


"Sebagai insentif untuk menggalakkan warga kota melakukan urusan secara dalam talian, pembayaran yang melibatkan semua fi permohonan, akan diberikan rebat 10 peratus sepanjang tahun 2022," katanya.

Dalam menangani isu perubahan iklim dunia, Ismail Sabri turut menyokong penuh inisiatif Kuala Lumpur membantu kerajaan mencapai sasaran negara neutral karbon.

"Ini kerana Malaysia disasar menjadi negara neutral karbon seawal-awalnya pada 2050.

"Bagi mencapai hasrat ini, Kuala Lumpur perlu maju ke hadapan seiring dengan bandar raya-bandar raya besar yang lain untuk mencapai matlamat global dalam menangani isu perubahan iklim," katanya.

Covid-19 tak halang Kuala Lumpur kembang pesat



ISMAIL Sabri Yaakob memalu gong ketika Majlis Sambutan Ulang Tahun Ke-50 Bandaraya Kuala Lumpur baru-baru ini.

KUALA LUMPUR: Walaupun pandemik Covid-19 melanda negara sejak dua tahun lalu, ia tidak menghalang Kuala Lumpur untuk terus berkembang pesat sebagai bandar terbesar negara apabila penduduknya kini mencecah 8 juta orang.

Perdana Menteri, Datuk Seri Ismail Sabri Yaakob melahirkan rasa bangganya terhadap pembangunan Kuala Lumpur yang genap usia 50 tahun sejak diisytiharkan sebagai bandar raya pertama di Malaysia pada 1972.

Katanya, Kuala Lumpur sebagai ibu negara Malaysia mencapai usia matang dan mengalami evolusi seiring dengan perubahan masa.

"Jika pada era awal

pertumbuhan, Kuala Lumpur dipenuhi rumah-rumah atap nipah, kini ia meriah dengan bangunan pencakar langit serta perkembangan pesat penempatan penduduk.

"Dunia terus mengenali Kuala Lumpur melalui mercu tanda hebat seperti Menara Berkembar Petronas setinggi 88 tingkat yang pernah mencatat sejarah sebagai bangunan tertinggi di dunia," katanya.

Beliau turut berbangga dengan Menara Kuala Lumpur yang merupakan menara tunggal ketujuh tertinggi di dunia.

"Kini, Kuala Lumpur memiliki mercu tanda baharu iaitu Menara Merdeka 118 yang merupakan

menara kedua tertinggi di dunia selepas Burj Khalifa dan tertinggi di Asia Tenggara pada ketinggian 678.9 meter," katanya.

Ismail Sabri berkata, ia jauh beza dengan Kuala Lumpur ketika mula berkembang antara Kuala Sungai Gombak dan Sungai Klang bermula pada 1857.

"Kuala Lumpur kemudiannya berkembang daripada sebuah pekan lombong bijih timah yang kecil dan sunyi kepada sebuah bandar yang dikenali ramai.

"Kepesatan ekonomi di kawasan perlombongan yang menjadi lubuk rezeki telah menarik minat masyarakat sekeliling untuk berhijrah ke sini," katanya.